

VENDIM
Nr. 904, datë 12.12.2012

**PËR PËRCAKTIMIN E KRITEREVE, TË PROCEDURAVE DHE DOKUMENTACIONIT TË
PËRFITIMIT TË NDIHMËS EKONOMIKE, NË ZONAT PILOT**

Në mbështetje të nenit 100 të Kushtetutës dhe të neneve 10, pikat 1 e 6, 20, pikat 3 e 4 dhe 42 e 42/1 të ligjit nr. 9355, datë 10.3.2005 “Për ndihmën dhe shërbimet shoqërore”, të ndryshuar, me propozimin e Ministrit të Punës, Çështjeve Sociale dhe Shanseve të Barabarta, Këshilli i Ministrave

VENDOSI:

1. Ndihma ekonomike do të pilotohet, sipas procedurave të përcaktuara në këtë vendim, në qarqet Tiranë, Elbasan dhe Durrës.

Njësitë e qeverisjes vendore të këtyre qarqeve, ndahen në strate, sipas tabelës nr. 1, që është pjesë përbërëse e këtij vendimi.

2. Përfitojnë ndihmë ekonomike:

- a) familjet pa të ardhura ose me të ardhura të pamjaftueshme;
- b) jetimët të cilët nuk janë në institucione;
- c) prindërit e fëmijëve të lindur trinjakë e më shumë njëherësh, që u përkasin familjeve në nevojë;
- ç) viktimat e trafikimit, pas daljes nga institucionet e përkujdesjes shoqërore deri në çastin e punësimit të tyre;
- d) viktimat e dhunës në marrëdhënie familjare, për periudhën e vlefshmërisë së urdhrin të mbrojtjes ose të urdhrin të menjëhershëm të mbrojtjes.

3. Për të përfitur ndihmë ekonomike kryefamiljari, së bashku me bashkëshorten paraqesin kërkesën pranë administratorit shoqëror të seksioneve të ndihmës dhe shërbimeve shoqërore në bashki/komunë, ku kanë vendbanimin, së bashku me:

a) Kopjen e kartës së identitetit të aplikantit dhe kopje të kartave të identitetit të anëtarëve të tjerë të familjes që kanë karta identiteti;

b) Certifikatën familjare që lidhet me regjistrin e familjes për të gjithë ata persona që janë pjesë e së njëjtës gjendje familjare;

c) Dokumente të tjera të nevojshme, për të përcaktuar të ardhurat familjare;

ç) Vërtetimin e trajtimit në institucionet e përkujdesjes shoqërore, për rastet e parashikuara në shkronjën “ç” të pikës 2 të këtij vendimi, të lëshuar brenda 30 ditëve të fundit;

d) Urdhrin e mbrojtjes ose urdhrin e menjëhershëm të mbrojtjes, për rastet e parashikuara në shkronjën “d” të pikës 2 të këtij vendimi;

dh) Vërtetimin e gjykatës që bashkëshortët e familjes që paraqitet për të përfitur ndihmë ekonomike janë në proces zgjidhjeje martesore;

e) Kopjen e noterizuar për statusin e jetimit, sipas kërkesave të parashikuara në ligjin “Për statusin e jetimit”, të ndryshuar, për rastet e parashikuara në shkronjën “b” të pikës 2 të këtij vendimi;

ë) Kopjen e vërtetimit të Komisionit Mjekësor të Caktimit të Aftësisë për Punë, për familjet që në përbërje të tyre kanë invalidë pune apo persona me aftësi të kufizuara që përfitojnë pagesë për aftësinë e kufizuar, përfshirë edhe dokumentet e tjera të përcaktuara në pikën 2 të këtij vendimi.

f) Certifikatën e pronësisë, të lëshuar nga Zyra e Regjistrimit të Pasurive të Paluajtshme apo aktin e marrjes në pronësi ose në përdorim të tokës (tapinë e tokës), për zonat ku regjistrimi i pronësisë nuk ka përfunduar ende.

4. Kërkesa dhe dokumentacioni i parashikuar në pikën 3 të këtij vendimi, paraqitet e ndarë nga secili bashkëshort, për rastet kur janë në proces zgjidhjeje martese dhe ende nuk ka një vendim gjykatë të formës së prerë.

5. Administratori, në prani të kryefamiljarit dhe bashkëshortes, plotëson:

a) formularët për aplikim për ndihmë ekonomike, sipas shtojcës 1, që është pjesë përbërëse e këtij

vendimi dhe përmbledh informacionin për:

- i) demografinë e familjes, arsimin dhe punësimin;
- ii) llojin e banesës;
- iii) pasuritë/asetet shtëpiake;

iv) të ardhurat nga programet e mbrojtjes shoqërore dhe të ardhurat e tjera. Ky formular plotësohet një herë në vit;

b) deklaratën, sipas shtojcës 2, që është pjesë përbërëse e vendimit të përfitimit të ndihmës ekonomike dhe që plotësohet çdo 3 (tre) muaj.

6. Administratorët shoqërorë janë të detyruar që dokumentet e përcaktuara në pikën 3 të këtij vendimi, t'i ruajnë sipas legjislacionit për ruajtjen e dokumentacionit.

7. Ndryshimi i vendbanimit shoqërohet me transferim të ndihmës ekonomike brenda zonave të pilotimit.

8. Përfshihen nga përfitimi i ndihmës ekonomike familjet, të cilat kanë në përbërje të tyre edhe një anëtar të vetëm që plotëson kushtet e mëposhtme:

a) Ndarjen e qëllimshme të anëtarëve të familjes, kur nuk krijohet një kurorë e re, me përjashtim të rastit vajzë nënë.

b) Moslejimin e verifikimit të situatës sociale ekonomike në familje, edhe pas njoftimit të dytë nga ana e administratorit shoqëror.

9. Pas plotësimit të formularit “Aplikim për ndihmë ekonomike”, administratori shoqëror në bashki/komunë, brenda 10 (dhjetë) ditëve të para të çdo muaji, hedh në Regjistrin Kombëtar elektronik të dhënat e familjeve/individëve pretendues për ndihmë ekonomike, si dhe të dhënat e paraqitura nga vetë aplikuesi për të përfituar pagesën e aftësisë së kufizuar ose shërbime të përkujdesjes shoqërore, sipas dokumentacionit të parashikuar në legjislacionin në fuqi.

10. Drejtoria Rajonale e Shërbimeve Sociale Shtetërore, pas ardhjes së vendimit për propozim, nga këshilli i njësisë së qeverisjes vendore, sipas pikës 5 të nenit 42/1 të ligjit, verifikon të dhënat e hedhura në regjistër, konfirmon saktësinë e tyre pranë autoriteteve shtetërore përgjegjëse dhe merr vendimin, përkatësisht:

a) nëse familja ose individi në nevojë i plotëson kriteret si përfitues i ndihmës ekonomike, të përcaktuara në këtë vendim të Këshillit të Ministrave, dhe vlerëson masën e përfitimit të tyre;

b) refuzon kërkesën nëse familja ose individi në nevojë nuk i plotëson kriteret si përfitues i ndihmës ekonomike, të përcaktuara në vendimin e Këshillit të Ministrave;

c) refuzon kërkesën kur ka deklarime të rreme gjatë plotësimit të formularit “Aplikim për ndihmë ekonomike”;

ç) përcjelljen e dosjes për vlerësim në KMCAP, për personat me aftësi të kufizuara;

d) dërgimin në Drejtorinë e Përgjithshme të Shërbimit Social Shtetëror, për caktimin e ofruesit të shërbimit, për individët që kanë nevojë për shërbime të përkujdesjes shoqërore, kur ky shërbim nuk ofrohet në njësinë e qeverisjes vendore.

11. Për rastet e parashikuara në shkronjat “a” “b” dhe “c” të pikës 10 të këtij vendimi, i dërgohet kryetarit të njësisë së qeverisjes vendore vendimi:

a) për të njoftuar kërkuarësit për përfitimin e ndihmës ekonomike;

b) për të kryer veprimet financiare, për kryerjen e pagesës, për përfituesit e ndihmës ekonomike.

12. Vendimi për trajtimin me ndihmë ekonomike përcaktohet duke përdorur një formulë të vazhdueshme, që përfshin parametra të lidhur në mënyrë empirike me vlerësimin e situatës ekonomike të familjeve, të tilla si: kushtet e jetesës, zotërimi i pasurive, të ardhurat nga remitancat. Formula e pikëzuar merr parasysh karakteristikat e ndryshme strukturore të familjeve urbane dhe rurale.

Ndihma ekonomike mund të jetë në masë të plotë ose të pjesshme. Përlllogaritja e masës së ndihmës ekonomike, për familjet e përzgjedhura në bazë të formulës së pikëzimit, bëhet sipas udhëzimit të miratuar nga Ministri i Punës, Çështjeve Sociale dhe Shanseve të Barabarta.

Treguesit e vlerësimit për sistemin e pikëzimit janë sipas shtojcës 3, që është pjesë përbërëse e këtij vendimi.

13. Njësia e qeverisjes vendore ka të drejtë të trajtojë me ndihmë ekonomike, me fondet e

siguruara nga të ardhurat e saj, edhe për periudha më të gjata se ajo e pilotimit, sipas këtij vendimi.

14. Masa e plotë e ndihmës ekonomike për familjen, pavarësisht nga përbërja e saj, nuk mund të jetë më e lartë se 8 000 (tetë mijë) lekë në muaj.

15. Masa e ndihmës ekonomike, në muaj, për prindërit e fëmijëve të lindur:

a) trinjakë, është 3000 (tri mijë) lekë për çdo fëmijë;

b) katërnjakë, është 4000 (katër mijë) lekë për çdo fëmijë;

c) pesënjakë, është 5000 (pesë mijë) lekë për çdo fëmijë.

16. Masa e ndihmës ekonomike për viktimat e trafikimit është 3000 (tri mijë) lekë në muaj. Kjo ndihmë ekonomike përfitohet pas daljes nga institucionet e përkujdesjes shoqërore, deri në çastin e punësimit të tyre.

17. Masa e ndihmës ekonomike për viktimat e dhunës në marrëdhëniet familjare është 3000 (tri mijë) lekë në muaj. Kjo ndihmë ekonomike përfitohet gjatë periudhës së vlefshmërisë të urdhrit të mbrojtjes ose urdhrit të menjëhershëm të mbrojtjes, të përcaktuar në vendimin e gjykatës.

18. Për anëtarin e familjes në nevojë, që është person me aftësi të kufizuara, invalid pune, nuk llogaritet masë ndihme ekonomike në strukturën e masës së ndihmës ekonomike për familjen.

19. Kur në përbërjen e strukturës së re, për efekt të llogaritjes së masës së ndihmës ekonomike, mbetet vetëm një anëtar, masa e ndihmës ekonomike për këtë të fundit është ajo e llogaritur për këtë anëtar.

20. Ngarkohen të gjitha organet e administratës shtetërore dhe njësitë e qeverisjes vendore, të përcaktuara në pikën 1, për zbatimin e këtij vendimi.

21. Ngarkohet Ministri i Punës, Çështjeve Sociale dhe Shanseve të Barabarta të nxjerrë udhëzimet e nevojshme në zbatim të vendimit.

Ky vendim hyn në fuqi pas botimit në Fletoren Zyrtare dhe i fillon efektet financiare pas përcaktimit të formulës së pikëzimit dhe ngritjes së Regjistrit Elektronik Kombëtar.

KRYEMINISTRI

Sali Berisha